

## Акафист Пресвятой Богородице пред иконой «Иверская»

---

### Кондак 1

Взбранной Воеводе, Владычице нашей Богородице, похвальная пения приносим Ти раби Твои, яко пришествием честнаго образа Твоего стяжавшии щит крепкий, стену неборимую и стража неусыпна. Ты же, яко имущая державу непобедимую, покрый и защити нас, Владычице, от всех врагов видимых и невидимых и избави от всякаго вреда, душевнаго и телеснаго, да зовем Ти:

Радуйся, благая Вратарнице, двери райския верным отверзающая.

### Икос 1

Ангел предстатель послан бысть рещи Богородице, егда паде Ей жребий апостольскаго служения в земли Иверстей: «Не разлучайся Иерусалима, жребий же, Тебе падший, просветится в последние дни, Ты же имаши потрудитися в земли, юже Тебе Бог изволит». Темже [зовем Ти]:

Радуйся, Еюже Евангелие благовестится; радуйся, Еюже идольская прелесть упразднится.

Радуйся, Еюже власть князя тмы разрушится; радуйся, Еюже Царство Христово утвердится.

Радуйся, падших во тму идолослужения к свету Евангелия воззвание; радуйся, от рабства диаволу в свободу славы чад Божиих приведение.

Радуйся, готовая служительнице Сына Своего и Бога; радуйся, послушанием преслушание Евы исцеляющая.

Радуйся, высот добродетелей; радуйся, глубино смиренномудрия.

Радуйся, Еюже невернии познают Творца; радуйся, Еюже вернии усыновляются Отцу.

Радуйся, благая Вратарнице, двери райския верным отверзающая.

### Кондак 2

Видящи Святая Дева дивное и новое о Себе промышление Божие, яко раба Господня, присно готовая творити волю Его, возопи: Аллилуия.

### Икос 2

Разум недоразумеваемый глагола ангельскаго разумен Тебе, Пречистая, творя Господь, управи шествие Твое к горе Афонстей, идеже проповедася Тобою Евангелие, и тако явися жребий Твой. Мы же радостно вопием:

Ра́дуйся, освятившая Афóн Свои́м пришéствием; ра́дуйся, низложившая та́мо и́долов.

Ра́дуйся, насадившая та́мо ве́ру и́стинную; ра́дуйся, неве́рие отгна́вшая.

Ра́дуйся, в жре́бий Себе́ го́ру сию́ избравшая; ра́дуйся, благода́ть сему́ ме́сту обеща́вшая.

Ра́дуйся, ве́рным, живу́щим в не́й, пода́тельница земны́х бла́г; ра́дуйся, споручнице́ ве́чнаго и́х спасе́ния.

Ра́дуйся, те́плая ходатаи́це о живу́щих в жре́бии Твоём; ра́дуйся, все́х враго́в и́х устраше́ние.

Ра́дуйся, ми́лость Сы́на Своего́ до сконча́ния ве́ка ме́сту сему́ обеща́вшая; ра́дуйся, благода́ть Его́ неотсту́пною бы́ти предре́кшая.

Ра́дуйся, благая́ Врата́рнице, двéри ра́йския ве́рным отверза́ющая.

### Конда́к 3

Си́ла Вы́шняго заступле́нием Богома́тере осení Святу́ю Го́ру, и удо́лия и де́бри ея́, я́ко село́ пространное́ показа́, все́м в ино́ческой жизни́ хотя́щим жа́ти спасе́ние, внегда́ пе́ти си́це: Аллилу́ия.

### И́кос 3

Име́я промы́шление о жре́бии Своём, лю́дех И́верския земли́, устро́ила еси́ в ме́сте, иде́же Сама́ к Афóну приста́ла еси́, обитель ро́ду и́х, в ти́хое приста́нище и́щущим спасе́ния, хотя́ дарова́ти ей́ в щит и огражде́ние ико́ну Свою́, да вси́ взыва́ют:

Ра́дуйся, послáвшая пропове́дницу Ева́нгелия в зе́млю И́верскую; ра́дуйся, обратившая сию́ страну́ от прелести́ идо́льской к све́ту Христо́ву.

Ра́дуйся, о́трасли неувяда́емая розго́, дивную́ лозу́ Ни́не дарова́вшая; ра́дуйся, от не́я произра́стившая грозди́е чуде́с и благи́я ве́ры.

Ра́дуйся, сад́ духо́вный на Афóне насадившая; ра́дуйся, струю́ из него́ просвеще́ния духо́внаго стране́ И́верстей источившая.

Ра́дуйся, Евфи́мия златослове́сныя уста́; ра́дуйся, Торни́кия непобеди́мая кре́посте.

Ра́дуйся, царей́ благоче́стивых укрепле́ние; ра́дуйся, ино́ков огражде́ние.

Ра́дуйся, ти́хое приста́нище и́щущих спасе́ния; ра́дуйся, ве́чный поко́й им уготовля́ющая.

Ра́дуйся, благая́ Врата́рнице, двéри ра́йския ве́рным отверза́ющая.

#### Кондак 4

Бурю внутрь имѣя помышлений сумнительных, честная вдовица, яже в Никей, смятеся, зря копием воина иконоборца прободену святую и чтимую икону Богоматере и абие источившу кровь и, страхом обдержима, да не поругана будет святая икона, с молитвою слезоточащи вверже в море. Увидев же ю прямо верху воды путь творящу и текущу к западу, возопи с веселием: Аллилуия.

#### Икос 4

Видеша иноцы Святыя Горы явльшийся в мори яко пламень, яко столп огнен, егоже верх досязаше небеси, яко солнце сияющее, и в нощи притекоша к краю моря и, видевше святую икону Богоматере, по морю носимую силою свыше, возопиша Благодатней:

Радуйся, купино, Законоположником предзрима; радуйся, столпе огненный, наставляяй сущия во тме.

Радуйся, лестнице, досязающая до небес, еюже сниде Бог; радуйся, мосте, преводяй сущих от земли на небо.

Радуйся, заре таинственного дне; радуйся, звездо, являющая Солнце.

Радуйся, Свет неизреченный родившая; радуйся, еже како ни единого же научившая.

Радуйся, облеченная в солнце, сияющая благодатию и славою всей вселенней; радуйся, молние, души просвещающая и верных смыслы озаряющая.

Радуйся, светлосте, во тме светящая; радуйся, яко многосветлое возсияваеши просвещение.

Радуйся, благая Вратарнице, двери райския верным отверзающая.

#### Кондак 5

Боготечную икону Свою дати хотя Иверстей обители, рекла еси, Богомати, преподобному Гавриилу: «Иди с ликом иноков к брегу моря, сниди в пучину и прими икону Мою». Он же, верою и любовию окривляемь, по воде, аки по суху ходя, прият ю во объятия своя и, достигши сокровища, иным недостижимаго, в достояние иноков рода своего иверскаго, веселяся пояше: Аллилуия.

## И́кос 5

Ви́деша и́ноцы и́верстии мно́гажды ико́ну Богома́тере из хра́ма в верху́ врат мона́стырских на стѣну гра́да незримо́ю сило́ю изнесѣнную, ужа́сахуся и стоя́ху, зову́ще к не́й такова́я:

Ра́дуйся, святу́ю ико́ну да́ти на́м изво́лившая; ра́дуйся, покрóв ю́ бы́ти на́м обеща́вшая.

Ра́дуйся, любо́вь Твою́ к оби́тели на́шей показав́шая; ра́дуйся, благо́е о не́й промышлѣние явив́шая.

Ра́дуйся, по́мощь на́ша в чужде́й странѣ; ра́дуйся, в странствии на́шем утешение.

Ра́дуйся, Бо́жие к на́м благово́ление; ра́дуйся, на́ше к Бо́гу дерзнове́ние.

Ра́дуйся, слѣз на́ших изба́вление; ра́дуйся, си́рых на́с за́щитнице.

Ра́дуйся, огражде́ние на́ше; ра́дуйся, еди́на ра́досте на́ша.

Ра́дуйся, благо́я Вратарни́це, двѣри ра́йския ве́рным отверза́ющая.

## Конда́к 6

Пропове́дника творя́ Гаври́ила во́ли Своея́, рекла́ еси́ к нему́, Влады́чице: «Не приидо́х храни́ма бы́ти от вас, но да бу́ду Аз храни́тельница ва́ша не то́кмо в настоя́щем, но и в бу́дущем ве́це. Се́ даю́ вам зна́мение: до́ндеже зрите́ в мона́стыре́ ико́ну Мою́, не оскуде́ет ва́м благода́ть Сы́на Моего́ и ми́лость», да вопи́ют Ему́ вси́: Аллилу́ия.

## И́кос 6

Воссия́ ра́дость ве́лия слы́шавшим Твою́, Богома́ти, обетова́ния, и Тебе́, небѣсней Вратарни́це, хра́м на вратѣх оби́тели с весѣлием и́ноцы воздвиго́ша и возопи́ша та́ко:

Ра́дуйся, храни́тельница на́ша в настоя́щем ве́це; ра́дуйся, предста́тельница на́ша в бу́дущем.

Ра́дуйся, стра́ху Бо́жию на́с науча́ющая; ра́дуйся, на пу́ть добродѣтели наставля́ющая.

Ра́дуйся, дерзнове́ние на́ше и наде́ждо; ра́дуйся, упова́ние на́ше и покрóв.

Ра́дуйся, благоутро́бие Сы́на Своего́ к на́м преклонив́шая; ра́дуйся, благода́ть Его́ неоску́дно пребы́вати с на́ми возвеща́ющая.

Ра́дуйся святу́ю ико́ну залого́м ми́лости да́вшая; ра́дуйся, да́р чуде́йства ей дарова́вшая.

Ра́дуйся, прило́г вся́каго зла́ от оби́тели отража́ющая; ра́дуйся, всему́ благо́му вход отве́рзающая.

Ра́дуйся, благая Врата́рнице, двéри райския вёрным отве́рзающая.

### Конда́к 7

Хотя́щу иногда́ злочести́вому Ами́ре оби́тель Иверскую разори́ти и ста́до ино́ков, та́мо собра́нное, разсе́яти, ско́ро позна́ кре́пкое оби́тели заступле́ние от Богома́тере, уви́дев корабли́ своя́ в пучи́не мо́ря погрязши́я и ратники́ изги́бши́я. И прише́д со смире́нием, серебро́ и злато́ в оби́тель да́ше, моли́твы прося́. Ино́цы же, ви́девше сия́, возопи́ша к Бо́гу: Аллилу́ия.

### И́кос 7

Но́выя и безчи́сленныя чуде́са́ показа́ Богома́терь, в оби́тели оскуде́ние вина́, му́ки и еле́я восполня́ющи, бесны́я исцеля́я, хро́мым да́руя хождéние, слепы́м прозрéние и вся́к недуг врачу́я, да, видя́ще чуде́са́ сия́, воспева́ют Тебе́:

Ра́дуйся, Взбра́нная Воево́до, враги́ побежда́ющая; ра́дуйся, ско́рая на по́мощь призыва́ющим Тя́.

Ра́дуйся, не презира́ющая моле́ния на́шего; ра́дуйся, обеща́ния Своего́ не отступа́ющая.

Ра́дуйся, ско́рбь оби́тели в ра́дость претворя́ющая; ра́дуйся, оскуде́ние оби́тели восполня́ющая.

Ра́дуйся, слепы́х прозрéние; ра́дуйся, хро́мых хождéние.

Ра́дуйся, все́х немощны́х целительнице́; ра́дуйся, все́х ско́рбных утешительнице́.

Ра́дуйся, я́ко не престаёши́ промы́ляющи́ и спаса́ющи нас; ра́дуйся, я́ко от то́ликих бе́д избавля́еши нас.

Ра́дуйся, благая Врата́рнице, двéри райския вёрным отве́рзающая.

### Конда́к 8

Стра́нно покрыва́емую от ико́ны Богома́тере оби́тель Иверскую слы́шав патриарх Ни́кон, вожде́ле и Росси́стей стране́ благода́ти Ея́ стяжа́ти прича́стие, сего́ ра́ди, созда́в оби́тель в че́сть сла́внаго о́браза, со тща́нием испроси́ изображе́ние чудотво́рнаго о́браза Богома́тере, да, покровом Ея́ защища́еми, вопию́т Бо́гу: Аллилу́ия.

## И́кос 8

Вся́ су́щи в вы́шних, но и ни́жних не отступа́я, благоизво́лила еси́, Богома́ти, яко́же дре́вле Анто́нию дарова́ся благослове́ние горы́ Афóнскаго на утвержде́ние оби́тели Пече́рскаго, дарова́ти и но́вой оби́тели в стране́ Росси́йстей Свою́ благода́ть, е́юже благослови́ла еси́ Афóн, в подобии́ честна́го о́браза Твоего́. Те́мже взыва́ем Ти́:

Ра́дуйся, страны́ Росси́йскаго покрóве, ши́рший о́блака; ра́дуйся, правосла́вныя ве́ры в не́й огражде́ние и утвержде́ние.

Ра́дуйся, Правосла́вныя Це́ркве непоколебимый сто́лпе; ра́дуйся, ересей́ и расколов о́бличе́ние.

Ра́дуйся, све́тлыми луча́ми чудотво́рных ико́н всю́ страну́ озаря́ющая; ра́дуйся, да́ры исцелений́ и ми́лостей от ни́х источа́ющая.

Ра́дуйся, ски́птры ца́рей на́ших утвержде́ние; ра́дуйся, враго́в устраше́ние.

Ра́дуйся, святи́телей весе́лие; ра́дуйся, иере́ев похва́ло.

Ра́дуйся, ино́ков наста́внице; ра́дуйся, всего́ ро́да на́шего спасе́ние.

Ра́дуйся, благая́ Врата́рнице, двéри ра́йскаго ве́рным отверза́ющая.

## Конда́к 9

Вся́ко тща́ние иму́ще о написа́нии честна́го о́браза ми́лостивыя Врата́рницы, со́нм по́стников и́верских моле́бная пёния соверша́ет, водо́ю от чудныя ико́ны омыва́ет дску́, на не́йже има́ть изобрази́тися честный́ о́браз, и преподо́бнаго Иамвли́ха освяща́ет, и́же подви́зався в посте́, моли́тве и бде́нии со все́ю бра́тиею, списа́ вапы́, свято́ю водо́ю и моща́ми освяще́нными, честно́е изображе́ние Богома́тере, вы́ну моля́ся и вопия́ Бо́гу: Аллилу́ия.

## И́кос 9

Вити́я многовеща́ннаго, яко́ рыбы́ безгла́сныя, ви́дим о Тебе́, Богоро́дице, недоуме́ют бо, како́ по досто́инству похвалити́ вся́ чудеса́ Твоя́, явле́нная ро́ду на́шему от святи́я Твоея́ ико́ны: е́ще бо на пу́ти в Росси́йскую страну́ чудоде́йствоваше, благочести́вому Ману́илу повелева́я вы́куп да́ти невер́ным, возбра́няющим ше́ствие святи́я ико́ны в страну́ Ру́сскую, и сугу́бо е́му по́слежде отда́вши. Мы́ же, дивя́щися, ве́рно вопие́м Ти́:

Ра́дуйся, исто́чнице чуде́с неисчерпа́емый; ра́дуйся, вся́кия ми́лости пода́тельница.

Ра́дуйся, всегда́ тёплая о нас ходатаице к Бо́гу; ра́дуйся, промышлѣния Его́ о нас сокровище.

Ра́дуйся, су́щим в беда́х прибежище; ра́дуйся, скорбящих утешѣние.

Ра́дуйся, больны́х исцелѣние; ра́дуйся, немощны́х укреплѣние.

Ра́дуйся, вдовъ заступлѣние; ра́дуйся, сиротствующи́х милосѣрдая Ма́ти.

Ра́дуйся, заблуждающих на пу́ть истины обращѣние; ра́дуйся, грѣшников к покая́нию воззва́ние.

Ра́дуйся, благая́ Вратарнице, двѣри райския́ вѣрным отверза́ющая.

### Конда́к 10

Спасти́ хотя́ мно́гия лю́ди от бѣд и скорбѣй, источа́еши, Богома́ти, неоску́дный исто́чник ми́лости от Своея́ ико́ны ро́ду нашему́: се́ бо и в ца́рствующем гра́де Москвѣ, благая́ Вратарница, явля́еши́сь все́м поклоня́ющимся Тебе́, ско́рое вспомо́жение пода́вая, и в но́вой обители́ Иверстей благода́ти стру́и от ико́ны Твоея́ испуща́еши, и во инѣх градѣх, обителех и все́х чту́щим Тя́ полѣзное проше́ние исполня́я. Те́мже, прославля́я Бо́га, да́вшего́ нам благода́ть такую́ю, вопи́ем Ему́: Аллилу́ия.

### И́кос 10

Стена́ еси́ ино́ческому чи́ну, Богороди́це, и все́м, к Тебе́ прибега́ющим, и́бо небесе́ и земли́ Творец, все́лся в дѣвственной утробѣ Твоей, научи́ все́х чистоты́ и целомудрия́ ревните́лей возглаша́ти Тебе́:

Ра́дуйся, дѣвства́ сосу́де избра́нный; ра́дуйся, чистѣйший о́бразе целомудрия́.

Ра́дуйся, черто́же безсе́меннаго уневе́щения; ра́дуйся, Невѣсто́ нене́вестная.

Ра́дуйся, Се́ятеля́ чистоты́ ро́ждшая; ра́дуйся, вѣрных Го́сподеви́ сочета́вшая.

Ра́дуйся, в бу́ри искуше́ний ско́рая помо́щнице; ра́дуйся, прило́ги врага́ отража́ющая.

Ра́дуйся, мглу́ душевре́дных страсте́й отгоня́ющая; ра́дуйся, помы́слы очища́ющая.

Ра́дуйся, земны́я сла́сти презира́ти навча́ющая; ра́дуйся, к го́рнему умы́ и сердца́ направлѣющая.

Ра́дуйся, благая́ Вратарнице, двѣри райския́ вѣрным отверза́ющая.

### Конда́к 11

Пе́ние всякое побежда́ется, спростре́тися тща́щееся ко мно́жеству мно́гих щедро́т Твои́х: равночи́сленныя бо песка́ песни́ аще прино́сим Ти, Влады́чице на́ша Богоро́дице, ничто́же соверша́ем досто́йно, яже подава́еши нам, о Тебе́ вопию́щим: Аллилу́ия.

### И́кос 11

Светопріёмную́ свещу́, су́щим во тме́ бѣд явльшую́ся, зрím святу́ю ико́ну Богома́тере: невещественный бо о́гнь благода́ти прие́млющи, лучами чудес́ всех оза́ряет, науча́я си́це взыва́ти Благосло́венней:

Ра́дуйся, во вся́ких ну́ждах ско́рое вспоможе́ние; ра́дуйся, в печале́х бы́строе услы́шание.

Ра́дуйся, от огня́, меча́ и наше́ствия иноплеме́нных нас́ избавля́ющая; ра́дуйся, от гла́да и напрасны́я сме́рти нас́ свобожда́ющая.

Ра́дуйся, от я́звы и всегуби́тельства сме́ртнаго нас́ соблюда́ющая; ра́дуйся, бѣдству́ющим в пу́ти, на су́ше и на вода́х внеза́пное вспоможе́ние.

Ра́дуйся, я́зв душе́вных и теле́сных врачева́ние; ра́дуйся, оста́вленных врача́ми в Свои́ руки прие́млющая.

Ра́дуйся, милосе́рдая утѣшительнице́ всех ско́рбящих и обремене́нных; ра́дуйся, не отверга́ющая всех презре́нных и отверже́нных.

Ра́дуйся, са́мых отча́янных из ро́ва поги́бели исхища́ющая; ра́дуйся, и мене́, обнаже́ннаго до́брых де́л, не оставля́ющая Свои́м покровом и заступле́нием.

Ра́дуйся, благая́ Врата́рнице, двѣри райския́ ве́рным отверза́ющая.

### Конда́к 12

Благода́ть да́ти восхоте́в долго́в дре́вних, всех долго́в Решите́ль челове́ком, прии́де Собо́ю ко отше́дшим Того́ благода́ти и, раздра́в рукописа́ние, дарова́ нам кре́пкое Богоблагода́тныя хода́тайство, да вопие́м вси́ моли́твами Ея́: Аллилу́ия.

### И́кос 12

Пою́ще Твоя́ чудеса́, явля́емая нам в жи́зни се́й, хва́лим Тя, Богоро́дице, яко́ неисчерпа́емый исто́чник ми́лости. Но, припа́дая к Тебе́ пред чудотво́рною ико́ною Твое́ю, мо́лим Тя смире́нно, бу́ди нам покров и защи́щение и в де́нь кончи́ны наше́я, и егда́ има́мы предста́ти на су́д стра́шному престолу́ Сы́на Твоего́, да вопие́м Ти:



Ра́дуйся, во сла́ве приседа́ющая престо́лу Сы́на Твоего́ и та́мо на́с воспомина́ющая; ра́дуйся, с Сы́ном Твои́м и Бо́гом ве́чно ца́рствующая и о на́с ходата́йствующая.

Ра́дуйся, упова́ющим на Тя́ коне́ц живота́ непосты́ден даю́щая; ра́дуйся, безболезненную и мирную кончи́ну устроя́ющая.

Ра́дуйся, мыта́рств го́рьких изба́вление; ра́дуйся, от вла́сти кня́зя возду́шного свобожде́ние.

Ра́дуйся, грехо́в на́ших непомино́вание; ра́дуйся, по Го́споде упова́ние на́м блаже́нных жи́зни.

Ра́дуйся, упова́ющим на Тя́, одесну́ю Сы́на Твоего́ стоя́ние устроя́ющая; ра́дуйся, блаже́ннаго гла́са о́наго, небе́снаго Ца́рствия насле́дие обеща́ющего, слы́шати сподо́бляющая.

Ра́дуйся, благая́ Ма́ти, все́х чту́щих Тя́ жи́ти с Собо́ю вселя́ющая; ра́дуйся, крѣ́пкая наде́ждо ве́чнаго спасе́ния все́м христиа́ном.

Ра́дуйся, благая́ Врата́рнице, двѣри ра́йския ве́рным отверза́ющая.

### **Конда́к 13**

О, Всепе́тая Ма́ти, Пресвята́я Госпоже́ Де́во Богоро́дице! При́зри на на́с, принося́щих смире́нно со слеза́ми ма́лыя сия́ молитвы́ пред пречи́стым Твои́м о́бразом и все́ упова́ние и наде́жду возложивших на Тя́, и изба́ви на́с все́х бе́д и напа́стей в животе́ се́м и бу́дущия изми́ му́ки, да спаса́емии Тобо́ю, вопие́м вы́ну: Аллилу́ия .

*Этот конда́к чита́ется трижды, затем и́кос 1-й и конда́к 1-й.*

### **Моли́тва ко Пресвяте́й Богоро́дице.**

О, Пресвята́я Де́во, Ма́ти Го́спода, Цари́це небе́с и земли́! Вонми́ многоболе́зненному́ въздыха́нию души́ нашея́, при́зри с высоты́ святы́я Твоея́ на на́с, с ве́рою и любо́вию покланя́ющихся пречи́стому о́бразу Твоему́. Се́ бо, грехми́ погружа́емии и скорб́ми́ обурева́емии, взирая́ на Тво́й о́браз, я́ко живе́й Ти́ су́щей с на́ми, прино́сим смире́нная молѣ́ния на́ша. Не има́мы бо ни ины́я по́мощи, ни ина́го предста́тельства, ни утеше́ния, то́кмо Тебе́, о Ма́ти все́х скорб́ящих и обременѣ́нных! Помози́ на́м, немощны́м, утоли́ скорб́ь на́шу, наста́ви на пу́ть пра́вый на́с, заблужда́ющих, уврачу́й и спаси́ безнаде́жных, да́руй на́м прочее́ вре́мя живота́ нашего́ в мире и ти́шине прово́дити, пода́ждь христиа́нскую кончи́ну и на Стра́шнем суде́ Сы́на Твоего́ я́вися на́м милосе́рдая Засту́пница, да всегда́ поѣ́м, велича́ем и сла́вим Тя́, я́ко благо́ю Засту́пницу ро́да христиа́нскаго, со все́ми угоди́вшими Бо́гу. Ами́нь.

**Молитва к Пресвятой Богородице перед Ея иконой, именуемой  
“Иверская Монреальская”**

О Преславная Госпоже, Царице Небесе и земли, Дево Богородице! Пред честною иконою Твоею ныне припадающе, умиленным сердцем вопием Тебе малое моление сие наше, яко раби неключими есмы, осуждение прияти имущии, но Твоим всемогущим ходатайством Судии умилоствления чающии. Веруем и уповаем, Владычице, яко не хотяй смерти грешных Сын Твой ходатайству Твоему внимлет, и ныне известихомся о сем чудным знамением от иконы Твоя мироточивыя, от неяже и исцеления обильно источила еси всем с верою и любовию к Тебе притекающим. Сего ради и вопием Тебе со слезами: пощади окаянство наше, прости нам неверность нашу, сокруши гордыни наша превозношение, отжени нечувствие от сердец ожесточенных, призри на въздыхание унынием боримых, уцеломудри нас будущаго воздаяния ожиданием. И подаждь, Госпоже, Церкви нашей в истине неколебимое стояние и в любви благое возвращение, от всех козней бесовских и суемудрии еретических покрый нас и расточенныя верныя собери воедино, да вси на земли православно Тя славящии и в Небесных чертозех воспети сподобятся всечестное имя Святыя Троицы и Твое милостивное о нас заступление во веки веков. Аминь.

**Тропарь Пресвятой Богородице перед Ея иконой, именуемой “Иверская-  
Монреальская”**

*Тропарь, глас 7*

От святыя иконы Твоя, о Владычице Богородице, миро благодатное источила еси обильно, верныя Твоя во изгнании сущия утешила еси и неверныя светом Сына Твоего просветила еси. Темже и припадаем к Тебе, Госпоже, со слезами: милостива нам буди в час судный, да некако толикую милость Твою восприявше, яко презорливи наказани будем, но подаждь нам Твоими молитвами плод духовный принести и спаси души наша.